

# DES FONTAINES

ACIDES DE LA FO.

rest d'Ardenne , & principale-  
ment de celle qui se trouue à Spa.

par M. Gilbert Lymborh

Medecin.




EN ANVERS,

Chéz Iehan Bellere , au Faucon.

M. D. LIX.

*Avec Privilege du Roy.*



A R E V E R E N D I S S I .  
M E , E T I L L V S T R I S S I M E P R I N -  
ce, Robert de Berges, Euesque de Liege,  
Duc de Bullon, Comte de  
Lossen, &c.

**L** Hales l'un des sept Sages de Grece, Prince tres  
illustre, á constitué l'Eau cōmencement de tou  
tes choses: lequel ensuiuant Homere, á appelé  
Ocean & Tethis comme les parens & nourris  
siers des autres elemens: Apres iceus est venu Pindare, le  
quel á preposé l'Eau denant tous autres elemens, comme la  
pl<sup>e</sup> necessaire & vtile en l'vsage de la vie humaine, & sans  
laquelle, tous les animaux ne scauroient viure aucunement.  
Ce que toutesfois Plutarche á reuoqué en doute, quand il dis  
pute, lequel des deux est le plus necessaire pour la vie hu  
maine, l'Eau, ou le feu. Parquoy, ce n'est pas de merueille si  
iadis les Gentiles & Ethniques, ont eu en si grand estime  
tant de fontaines & fleuves, que, pour les biens & vtilité,  
que les hōmes receuoient d'iceux, ilz les ont consacrez aus  
Dieus, & les ont estimez dignes de tout boneur. Ce qu'on  
peut assi maintenāt voir estre auenu en ceste fontaine aci  
de, qui se troune en vostre Marquisat de Francemont. Car  
pour les singulieres & cachées vertus, dont elle guerit plu  
sieurs affligés de maladies tresgriues, les paisans & com  
mun peuple l'ont dediée à S. Remacle, à cause que ce bon &  
sainct Euesque (comme ils disent) se vnoit souuent esbatre  
à icelle

à icelle fontaine. Or pour ce que ceste fontaine, n'auoit esté  
par le passé en nulle estime, non pour autre chose, sinon que  
les vertus d'icelle estoient ignorées: i'ay commencé à recher-  
cher de plus pres la nature & qualité de ces fontaines aci-  
des, & les ayant trouuées par raisons subtiles, & diligen-  
te inquisition, proposay de les approuner par vives raisons  
& certaine experience. De la vient, que la fontaine qui es-  
toit bien pres delaissee, & tant peu estimée des habitans d'i-  
celle contrée, quilz s'en seruoient seulement pour boire: soit  
maintenant frequentée des nations estranges, & en tres-  
grand estime. Comme ainsi soit donques que plusieurs m'a-  
yent requis, & pressé par continuelles demandes, de mettre  
en lumiere & communiquer à tout le monde, ce que i'ay peu  
comprendre & certainement cognoistre, touchant la natu-  
re d'icelles fontaines: ie ne leur ay sceu denier leur demande,  
tant pour l'affection que ie porte au bien public, que pour la  
fiance que i'ay sous la protection de vostre Excellence. Car  
à qui pourroit on mieux donner ceste charge & prerogative  
de defense, qu'au Seigneur d'icelle terre, ou ceste fontaine  
sourd? Et combien que vostre Seigneurie Illustrissime pour-  
roit requérir choses beaucoup plus grâdes, & dignes de spe-  
culation plus haute, comme estant venu d'icelle famille, de  
laquelle sont issus tant de nobles & excellens Seigneurs l'un  
apres l'autre, & qui, (outre tant de monimens magnifiques  
& illustres de vos progeniteurs) estes doié de vertus  
tant singulieres, de doctrine si rare, & d'une telle dex-  
terité d'esprit pour manier les affaires de la Republi-  
que: toutesfois me confiant du bon vouloir que vostre

Seigneurie Illustrissime & enuers tous gens de letres, &  
principalement enuers moy, i'ay permis que ce mien ouura-  
ge, tissu de gros fil, vint en lumiere sous l'ombre de vostre  
nom. Il vous plaira doncques, à l'imitation d'Artaxerxes  
Roy des Perses, prendre en gré ce mien tel que l'escriit des  
fontaines acides: tout ainsi que luy (ayāt plus d'égard au bō  
vouloir de celuy qui luy offroit, qu'au don) receut benigne-  
ment l'Eau qu'un paisan luy offrit en chemin, laquelle il a-  
uoit puisée avec les mains de la riuere prochaine. A Dieu.  
De vostre cité de Liege ce. 28. de Mars. 1559.

De vostre Seigneurie Re-  
uerendissime & Illustrissi-  
me tres humble seruiteur.

Gilbert Lymborb.

# DES FONTAINES

ACIDES DE LA FOREST D'ARDENNE.

*Preface, en laquelle est parlé des Auteurs tant  
Anciens que Modernes, qui ont escrit de la  
vertu des Eaux medica-  
mentuses.*

**D**E ceux qui ont diligemment recherché la nature des Eaux & fontaines naissantes d'elles-mesmes, Aristote & Theophraste ont esté les principaus d'entre les Grecs, puis apres Sotion, & Ruphus Ephesien: finablement Galen & Oribase, toutesfois tous ceux la ons laissé par escript bien peu de choses certaines & desquelles ilz fussent asseurez: mais ilz semblent plustost en auoir parlé en general. Entre les Latins, Pline le vieil, Vitruue, & Senèque, suiuant le mesme sentier, en ont parlé vn peu d'auantage, mais ça & la seulement, & côme par maniere d'aquit. Apres tous iceux sont venus quelques Modernes, qui ont escrit diuersement des Eaux chaudes, & baings principalement. Mais il n'y en a pas eu vn, q̃ ie sache, qui ait particulieremēt faict mentiō de ces fontaines acides & froides, qui se trouuent en plusieurs endroits d'Alemaigne, d'Italie, & Hongrie, & principalement en cestuy nostre quartier de la forest d'Ardenne. Parquoy i'ay estimé que ie ne feroye pas mal, si pour le proufit & commodité de plusieurs malades, ie comprenoye en vn brief recueil, ce que par

longue experience i'ay cogneu d'icelles fontaines, & le mettoye en lumiere, veu que plusieurs m'en ont tres-  
instammét requis. Mais à fin que cela se puisse mieux  
faire, ie deduiray premierement en brief les differéces  
de l'eau tant simple, que meslée & medicamenteuse.

*¶ De la nature de l'Eau simple & potable, & des differen-  
ces d'icelle en bonté & malice.*

*Chap. premier.*

**L'**Eau simple & potable, qui est appellée des Grecs  
*ἁπλοῦς*, n'a aucune qualité, mais est pure, claire, froi-  
de, & insipide. Il y en a de plusieurs sortes : car ou elle  
est de fontaine, ou de fleuve, ou de pluie, ou de puis,  
ou de neige, ou de glace, ou de lac, ou d'e'tang : toutes  
lesquelles eaus sont différentes en bonté ou malice se-  
lon la nature de la terre & des lieux d'ou elles sourdēt  
& par lesquelz elles coulent, ou des choses dont elles  
sont engendrées. Car celle eau est estimée la meilleu-  
re, laquelle est clere & luisante, & approche au plus  
pres de la nature elementaire, laquelle est tresbonne  
pour garder la santé, & laquelle est treslegere, si on la  
vient à peser, ou laq'lle, tesmoing Hippocrates, se chauf-  
fe, & se refroide le plustost. Mais quant à celle que lon  
doit eslire pour la meilleure, Celsus Medecin tresex-  
pert a obserue ces degrés & differéces quād il dit : l'Eau  
de pluie est la plus legere, puis celle de fontaine, puis cel-  
le de riuiera, apres celle de puis, apres celle de neige ou  
glace, celle de lac est plus pesante, & encore plus celle  
des

des marez. Et entre celles qui sont egalles en pelanteur icelle est d'autât meilleure, qui tant plustost se reschauffe & se refroide, & en laquelle les legumes se cuisent le plustost. Et ce quant à la nature de l'Eau simple.

*De la vertu & qualité des Eaus qui naissent d'elles-mesmes, & d'icelle principalement qui entre les autres fontaines de la forest d'Ardenne, sourd au village de Spa.*

*Chap. 2.*

**L**Es Eaus meslees & medicamenteuses obtiennent diuerfes vert<sup>9</sup> & bié pres infinies propriétés & cōsistence, selô les choses avec lesquelles elles sont meslees, les lieux ou elles sont cōtenues & engêdrées, & les terres ou cōduicts par lequelz elles passent & se coulent. Car les vnes sont souphreuses, bitumineuses, alumineuses: les autres nitreuses, salées, ferreuses, & qui sentent l'aerain, le plomb: aucunes sont venimeuses & mortelles: & icelles toutes, soiét chaudes ou froides sourdent des veines de la terre. Les bitumineuses & souphreuses, à cause de l'amorce & nourriture inextinguible du feu en icelles cōtenue, sont chaudes pour la plus-part, combien qu'aucunefois elles soient mixtionnées avec deus ou plusieurs autres humeurs cōgelées & metaux q par ce moié téperêt & affoiblissent la chaleur d'icelles. Mais les autres sont fort différentes entre elles, tant en substance, qu'en qualitez, couleur, odeur, & faueur, desquelles toutes si on vouloit parler particulièrement, ce seroit vne chose hors de nostre propos

propos, & trop longue & facheuse. Car nous auõs seulement entrepris de parler de celle, qui, outre les autres qui sourdent par toute ceste forest d'Ardenne, est de plus grande renommée, & la plus estimée, au village de Spa anobli par icelle. Laquelle fontaine semble double, distinguée seulement de l'interualle des lieux dont elle sort, & differente seulement selõ la plus grande ou moindre adstrictiõ, cõme toutes les autres fontaines de mesme nature. Car celle qui est au village mesme, enclose de murs & voutée, semble de substance plus grosse & espesse, & participer dauantage de la nature & qualité du fer, par quoy elle peut mieux endurer le long chemin que ne fait l'autre. Mais celle qui sort du sommet de la montaigne, est de substance & parties plus subtiles, & plus idoine à prouoquer l'vrine, & lacher le ventre. Mais les effects de ces fontaines changent grandement selon les diuersites des natures & temperaments des corps. Desquelles toutes nous escrirons distinctement & à part. Maintenant nous parlerons du nom & de l'Etimologie de la fontaine.

¶ *Brief discours touchant icelle fontaine que Pline décrit au territoire des Tongres, laquelle se trouue estre celle de laquelle maintenant tous boient contre diuerses maladies.*

*Chap. 3.*

**P**Line l'ancien, home tresexcellent, & tresdiligent indagateur des natures & proprietéz des choses,  
&



& des causes latētes d'icelles, semble auoir cogneu seulement par ouyr dire ces fontaines medicamenteuses nostres. Car parlant en son Histoire naturelle, des miracles de diuerſes fontaines, eſcrit qu'il y a vne fontaine au pais de Tongres, qui ſemble reſpondre de toutes notes à ceſte noſtre fontaine: Et de fait en la fontaine qui a ſa ſource enuiron vn quart de lieue de la ville de Tongre, & qui retient encore le nom de fontaine acide, ne ſe trouue rien des choſes que Plinē luy attribue. Parquoy ou il faut quelle ſoit perie par lōgeur de temps y arriuant Eaus douces de quelque part, ou biē, qui eſt plus vray ſemblable, qu'il a parlē de ceſtes noſtres fontaines de la foreſt d'Ardenne. Car alors l'appellation des Tongres ſ'eſtendoit bien loing, de ſorte qu'il ſoit à preſumer que c'e ait eſté en ce temps là la ville capitale de bien pres toute la Belgique ( comme auſſi l'appellation des Achēes comprend en Polybe tous les habitans de Peloponneſus, maintenant appelle la Morée ) ou que tout ce pais qui eſt long & large a eſté comprins ſoubs le nom de la ville de Tongres lequel eſt pour le iourd'uy reduit en aſſes peu d'eſpace, comme eſt auſſi la propre aſſiete des anciens Eburons, dictz Liegeois. Plinē eſcrit en ceſte ſorte. Tōgres, ville de la Gaule, a vne fontaine inſigne, bouillonnant en pluſieurs endroiçts, qui eſt de ſauueur de fer, ce q̄ toutesfois on ne ſent pas ſinon apres l'auoir beūe: elle purge les corps, guerit fieures tierces & la grauelle. La meſme eau ſi on la met ſus le feu, deuiant trouble, &

en la fin rouge. Toutes lesquelles choses conuiennent fort bien à noz fontaines acides, sinon la faueur de fer astringente, laquelle ne se sent pas en la fin de la boisson, mais au commencement. De là est sortie l'appellation commune que le peuple luy donne: Car les Alemans l'appellent *Iser born* c'est à dire fontaine ferrée, & pour l'acidité d'icelle *Zuerborn*, c'est à dire fontaines acides. Les habitans d'icelle forest l'appellent Boullon, à cause des boullons qui sourdent avec grand bruit: & appellent les estrangers qui boient ceste eau, d'un vocable asses estrange, à scauoir Boullins, & Boublins. Maintenant venons à la situation d'icelle.

*¶ Du lieu, auquel ceste fontaine sourd, & de la nature d'icelle, & la maniere de la prendre.*

*Chap. 4.*

**C**ESTE fontaine sourd au sommet d'une montagne, distante enuiron demy lieue du village appelé vulgairement Sauenir, entre les arbres & pierres, en lieu assez penchant, regardant aucunement vers orient, & ce hors des fentes & creuasses d'une roche tref-dure, tout ainsi que les bouillons d'une eau chauffée sus le feu, pour les esprits enclos aux entrailles de la terre, de substance tenue, de couleur clere & argentine, d'odeur assez forte, & penetrant incontinent aux narines, & de faueur mordant la langue des le commen-

mencement, & astringente, mais qui deuient douce  
incontinent apres, alegeant merueilleusement les foi-  
uineux, par sa froideur actuelle. Il se trouue aussi au-  
pres de ceste fontaine vn ruisseau d'eau froide & ge-  
lée tombant du plus haut des montaignes, qui aug-  
menté par les pluies, vient souuent entrer au creux de  
la fontaine, & la rend plus foible, ioinct aussi que  
l'eau de la pluie, penetrant par les pores de la terre, se  
vient mēfler parmy. Parquoy en temps pluuiieux il  
la faut boire ou laisser avec discretion: car degenerant  
de sa temperature naturelle, elle debilité l'estomach  
si on la boit, & remplit de ventositez le ventre, & afoi-  
blit les intestins. En esté elle est extremement froide,  
en Yuer vn peu plus chaude. Aucuns la boient froi-  
de: les autres vn peu chauffée premier au feu: ce que ie  
ne puis du tout approuuer: Car, outre ce que toutes  
choses tiedes debilitent la force de l'estomach, elle ne  
perd point peu de sa force par la moindre decoction  
que ce soit, ce qui se cognoit plus euidentement si on  
la vient à cuire dauantage, par ce qu'elle pert du tout  
sa premiere & naturelle saueur. Si la trop grande froi-  
deur blesse le ventre, il faut menger incōtinent apres,  
ou de l'anis, ou de la canelle. Elle se boit du matin, &  
enuers le soir, trois heures deuant le repas, en quantité  
iuste, & non egalle en tous, mais selon les tēperamēts  
des personnes, la coustume, le temps de l'année, & le  
lieu, lesquelles il est facile d'ordonner à vn mede-  
cin scauant, & bien exercité és secrets de la nature,

sans que ie parle du reste des circonstances, lesquelles en la boisson deüe de ceste fontaine, comme en toutes autres medecines, doiuent estre obseruées: car quāt à celles qui ne se peuuent ne dire n'escrire, chacun en ā la quantité en soy, comme tesmoigne Galen. Car il se trouue des gens qui ne peuuent endurer nullement la grande quantité, & aucuns qui, pour l'incoustumance, la vomissent incontinent, & leur estomach en perd l'appetit. Au contraire il'y en ā qui ne s'en sauuent saouler, & en boient grāde quātité sans aucū danger, cōme font les beueurs d'eau, & qui sont choleriques & sanguins. Parquoy il faudra petit ā petit augmenter la quantité d'icelle, iusques ā ce qu'on soit paruenū ā quelque dose certaine & iuste, laquelle l'estomach puisse facilement porter, & en icelle perseuerer vn mois ou dauantage, selon que la difficulté de la maladie le requiert. Apres l'auoir beüe, il se faut pourmener tout bellement & asses long temps, & mouuoir & exercer le corps de quelque exercice leger, sans se lasser toutefois. Car par ceste maniere, l'eau commence ā exercer en l'estomach son office, & ā demōstrer sa force & vertu, prouoquant en aucuns l'vrine, lachāt le ventre aux autres, & faisant fort sūer les aucuns.

*¶ Des fontaines medecinales en general, & des vertus & effects particuliers de ceste fontaine acide.*

*Chap. 5.*

Nous

**N**ous auõs dit cy dessus, que ceste fontaine est du nombre des fontaines medicamenteuses ou medicinales: parquoy suyuant la coustume tant des medecins que des philosophes, il nous faut rechercher de plus pres les causes & la nature d'icelle, à fin que les ayant certainement cogneues, chacun medecin suyuant la methode en puisse vser facilement & asseurement, selon les diuerfes temperatures des corps. Les Auteurs Grecs desquelz nous auons fait dessus mention, ont enseigné asses legeremēt les natures & causes des Eaus qui naissent d'elles-mesmes. Puis apres Albert le grād á expliqué plus au long les mines d'icelles. Mais tout le dernier entre les Modernes á esté George Agricola lequel á tresdiligemment escrit toute la nature d'icelles, en ses liures metalliques. Il est donques notoire à tous, que les Eaus souterraines qui courent & se coulent par les veines & conduicts de la terre, boiuent & participēt de la nature & qualité des choses par lesquelles elles passent, soient metaux, soient humeurs geles soient pierres, ou terres, ou exhalations & vapeurs infectées: metaux dis-ie comme est l'or, argēt, ærain, fer, plomb, vis-argent, orpigment, sandaracha & semblables. Humeurs gelées, comme souphre, bitumen, alun, calcanthum, nitre ou salpêtre, sel. Pierres, comme les pierres precieuses, la pierre de chaux, marbre, sablon. Terres, comme diuerfes sortes de terre, croye, argille, marle, sable, terre-rouge, ochra, bol, & autres semblables. Lesquelles Eaus certes sont ou simples,

ou meſſées d'icelles, ou des deux enſemble, ou de pluſieurs de meſme ſorte & diuerſe: & ſont aucunesfois ſaines, aucunesfois venimeuſes & mortelles, prenantes leur nom ſelon la qualité qui abonde en elles.

*¶ De la nature de ceſte fontaine, & par quelz ſignes on la peut cognoiſtre, & des diuerſes opinions touchant la nature & qualité d'icelle.*

*Chap. 6.*

**I**L eſt certain donques que ceſte noſtre fontaine acide, y côcurrent toutes les notes, eſt ferrée & ſulphurée, la qualité toutesfois du ſoufre ſurmonte celle du fer: car des mines de fer elle en tire ſeulement la qualité: mais des pieces de ſoufre, elle en emporte quelque corps en paſſant: ce qui ſe peut demonſtrer euidentement, d'autant que gouſtée, elle reſtraint incontinent la langue, & ferre les pores d'icelle, puis apres deuient douce, & ſi on la tient long temps en la bouche, laiſſe quelque gouſt mauuais & oleagineus, enuoyant aux narines quelques fumées puantes. Dauantage, ſi on garde long temps icelle eau en quelque vaiſſeau, on verra au fond la terre rouge ou rubrique, qui eſt la mere du fer, & au deſſus on verra nager quelques filets ſulphureus ou oleagineus, en forme de toilles d'araignes, de couleur diuerſes, & de verd entreméſlé de iaune. En outre autour des murs de telles fontaines, & du canal par ou elles ſortent, on trouuera touſiours les bords taints de couleur rouge & rouſſatre, & le long d'icelles eaux

quand

quand elles ont coulé vn peu loing, se void au tour des pierres & lieux ou elles s'arrestent, quelques couleurs grasses entremeslées de verd & de iaune. Il y en á eu toutesfois aucuns qui ont estimé que la mine d'icelle fust plustost de Calcáthum que de fer, ce qui repugne au sens & raison naturelle, & y á plusieurs choses qui me retirent de telle opinion: car par ce moien, outre l'adstriction non petite quelle á, elle seroit aussi participante d'vne acrimonie asses gráde, par laquelle ceux qui la boiroient en seroient grandemét offensez, á cause de son erosion & vehemente chaleur: que plus est les habitans dudit lieu ne la boiroient point iournelle ment sans offense, & ne s'en porteroient tant bié, qui est vne asses gráde marque de la salubrité d'icelles caús & fontaines, que la santé entiere des habitans qui en boient. Finalement, attendu que plusieurs montaignes voisines abondent en mines de fer, & que toute ceste forest d'Ardenne, ne soit moins fertile de tel metal, que Aethalia, maintenant appellée Iulia, en la mer Tyrrhene, & que les eaux chaudes d'Aix, tant sulphureuses que bitumineuses, soyent seulement distantes de quatre lieües: il est raisonnable que celles fontaines ferreuses escoulées de telles minieres, ayent tiré á elles les qualites du fer, ce que no<sup>r</sup> auós aussi trouué par experience és distillations qui se font par l'alébic de verre.

*¶ Des effects de ceste eau cogneus par certaine experience, contre les opinions diuerses de quelques vns. Chap. 7.*

Nul

**N**VI donques ne sauroit douter, qu'il ne faille vser  
de cōiectures artificielles, pour discerner ces eaux  
medicineuses & bains tant chauds que froids: attendu  
que les choses souterraines, qui leur donnēt ceste qua-  
lité, soient cachées si profondes entrailles de la terre,  
que le plus souuent elles ont induit plusieurs Auteurs  
quien escriuent, en diuerles & contraires opinions.  
Parquoy à la façon des Medecins il faudra rechercher  
les qualitez & vertus d'icelles, hors des effects d'icelles,  
& euidentes impressions és corps suiets. Toutes ces  
fontaines acides refroident des la premiere rencontre  
& estanchent la soif, puis apres elchauffent legeremēt  
en quelques corps plus, és autres moins, & prouoquēt  
l'vrine & fueur, sil n'y á autre empēchement, sur la  
fin toutesfois elles desechent toutes generalement. Et  
de fait, qu'elles refroident euidemment du premier,  
puis apres qu'elles eschauffent legeremēt, & desechēt  
fort sur la fin, pour la diuersité des substances dont el-  
les sont meslées: ie l'ay autrefois trouué par certaine  
experience en deux malades, desquels l'un estoit capi-  
taine Aleman, bien robuste & sain, qui, apres en auoir  
beu par deux iours, tomba en vne fièvre continue a-  
uec diuerles pustules rouges esparfes par tout le corps,  
lequel ie fu contraint guerir par vne diete contraire, à  
scauoir froide & humide. L'autre, q estoit Espagnol,  
de temperature bilieuse & cholerique, & en esté, incō-  
tinent apres auoir beu de la fontaine, cheut en vne fie-  
vre tierce continue. De mesme opinion que moy á  
aussi



ausi esté M<sup>o</sup>signeur Augustin docteur Venicien, premier medecin de Henry huitieme Roy d'Angleterre. Mais quelcun se pourroit esmerueiller à bon droit, cōment la substance du souphre qui est meslée par my ceste fontaine, ne la rend point chaude, comme tous les bains parmy lesquelz est meslée quelque partie de souphre ou de bitumen. Responce. Combien que le souphre soit matiere tresdoine pour nourrir le feu par lequel les eaus soiēt rendues chaudes maintenāt plus, maintenant moins, selon qu'elles participent beaucoup ou peu de ladite mine: si est-ce qu'il est vray-semblable, que la puissance d'iceluy est moins reduite en effect, à cause de la quantité de l'eau passant qui s'y coule, & pour la froideur & sechereffe de la mine de fer qui y est adioincte, & que pourtant la force d'iceluy est debilitée, & s'enflambe moins. Dauātage, il se trouue par tout en diuers endroits du monde, plusieurs eaus sulphureuses froides, & semble que Galen en son liure *de sanitate tuenda*, ayt cogneū beaucoup d'eaus medicamenteuses froides.

*Discours touchant la vertu purgatiue de ceste fontaine, & de la faculté d'icelle pour prouoquer l'Vrine & la sueur.*

*Chap. 8.*

**N**Ous auons asses amplement escrit és chapitres precedens, de la nature & qualitez de ceste fontaine: maintenant il est besoing de parler quelque peu, de la difference des effects & operations d'icelle en di

uers corps. Car attendu que toutes les propres tempe-  
ratures des corps, que les Grecs appellent *idiosyncrasias*,  
soient inegales, indeterminées, & infinies, il est be-  
soin que ceste fontaine beüe, exerce diuersement ses  
operations en diuerses gens, en faisant vomir les vns,  
prouoquant l'vrine & lachant le ventre aux autres, exci-  
tant aux autres des vomissemens, & grandes euacua-  
tions par bas, & prouoquant à plusieurs l'vrine en a-  
bondance. Toutesfois il s'en trouue quelques vns,  
mais bien peu, lesquelz elle n'esmeut rien par haut ne  
par bas, ni par les vrines: mais au contraire restraint  
tous les pores & ouuertures, lesquelz se doiuent in-  
continent abstenir d'en boire, autrement ilz tombent  
en grandes douleurs coliques, & inflations d'esto-  
mac. Si on la prend en certaine & iuste quantité, elle  
lache le ventre, prouoque l'vrine, & purge quelque  
peu l'humeur melancolique, principalement celle qui  
est contenue es veines premieres, & taint les excre-  
mens de diuerses couleurs: sur tout elle prouoque bie  
fort les vrines & ouure les obstructions. Que peut  
empacher que ceste eau ne purge aussi l'humeur me-  
lancholique? car tout ainsi que le lapis lazuli & le dia-  
mant ont vne proprieté singuliere de tirer ceste hu-  
meur en abondance: en semblable maniere, le fer, qui  
á grande affinité avec la pierre d'Aymant, á ceste vertu  
speciale de purger, pour la similitude de leur nature:  
& qu'ainsi soit, il se trouue beaucoup de pierres d'Ay-  
mant es mines de fer dont abondent les Isles Aetha-  
lies

lies en la mer Ligustique. Aucuns attribuent ceste vertu purgatiue au Chalcantū, c'est vitriol, à cause qu'il y ayt quelque symbolization entre le fer & le cuiure, & que le fer en y adioustant du chalcanthum, se tourne facilement en cuiure, desquelz ie discorde en cest endroit, car l'eau en seroit trop acre, trop chaude, & trop erosiue, & se cognoistroit plus euidēment par les autres indices & effets du Chalcanthum. Mais pour autant que ces choses touchēt plus à l'Alchimie, nous laisserōs à chacun en cest endroit son iugement libre. Car par mesme moyen on pourroit douter & s'esmerveiller, quelle faculté a le Squama æris à purger l'eau des Hydropiques, & pareillemēt l'Euphorbe, l'Espurge, & autres medicamēs simples doūez de telle vertu.

*De la maniere de viure qu'il faut tenir en beuuant ceste fontaine, & comment il faut preparer le corps.*

*Chap. 9.*

**I**L appert par les choses precedentes, de quelles tēperatures, en quelles maladies, & en quel tēps, ces eaux acides se peuuent boire sans dāger. Mais deuāt que le declarer particulierement, nous dirons cōment il faut preparer les malades auant que de boire ceste fontaine, & de quelle maniere de viure ilz doiuent vser.

Primierement il faudra que ceux, qui veulent boire de ceste fontaine, se preparent selon l'exigence des qualitez des maladies; comme si la matiere qui est contenue es premiers conduits des veines, du ventricule,

& des parties inferieures du foye , est eſpeſſe & viſqueuſe, qu'elle ſoit premier incifée , attenuée, & nettoyée, & les obſtruſtiōs ouuertes : apres qu'ilz ſoient purgez de caſſe, ou de hiera picra Gal : ou de quelque autre medicament, comme de benediſta, ſelon l'exigence des humeurs : finalement, qu'il commence avec bonne eſperance à vſer de l'eau . Mais il faut eſlire le temps le plus conuenable à ſcauoir les mois d'eſté, May, Iuin, Iuillet, & Aoult: car le printemps, & l'automne ne ſont point ſi conuenables, pour ce que adonc l'aër eſt en ce pais , humide le plus ſouuent, & ſuſjet à grandes mutations. Et du commencement, il ne faudra pas boire beaucoup & ſouuent, mais venir petit à petit cōme par degrez à la iuſte meſure, ainſi que nous auons dit, à fin que la nature ainſi accouſtumée, puiſſe mieux mener l'eau beüe à ſon effect: car aux debiles & qui ont l'eſtomac relaché, la grande quantité leur eſt treſnuifible, ne plus ne moins qu'à ceux qui ont l'eſtomac fort froid . En la maniere donques & temps deuant dit, on la boira deux fois le iour, ou vne fois ſeulement ſi la vertu eſt trop debile . La maniere de viure ne doit eſtre guere differente de la commune, moiennant que la viande ſoit facile à digerer & bonne: roſtie pour la plus part, & aucune fois boullie, ſans eſtre trop curieux à faire broüets d'eſpiceries & herbes chaudes. Es eſtomacs bilieus, ces viandes legeres & de facile digeſtion, ſe corrópent facilement, & deüiennent nido-reuſes, ou flairantes le pōurri , parquoy il les faudra  
nour.

nourrir de viandes plus solides, & de plus difficile digestion. Il faut reietter toute sorte de fruiçts premiers meurs, à cause qu'en celle maniere de viure ilz engendrent des humeurs corruptibles & aquées. Les autres dessertes qu'on met à l'yssue de table se peuuent manger, comme escorces de citrons, coriandre, anis, amandes, noix cōfites, & telles dragées bōnes à l'estomach. Il faut laisser tous laiçtages. Ceux qui sont acoustumez au vin, boiront vin mediocre, comme petit vin de Rhin ou de Moselle, trépé, ou eaiué de la fontaine mesme, à cause qu'on le trouue plus agreable. Ce pendant s'il auenoit quelque accident au malade, le prudent medecin cherchera remede pour subuenir quāt & quant au mal: car nous auons dit que tous remedes ne sont conuenables egaleement à toutes natures: toutesfois nous n'auons iamais trouué que quelcun ayt esté grieuement offensé du bruuage de ceste eau (moienant qu'il eût vsé de bon conseil) sinon ceux qui estans tourmentez de maladies difficiles, & de vertus debiles, en ont beu temerairement, & intēperāment. Les exercices se doiuent tousiours faire du matin, & au soir deuant le souper. On peut aussi se pourmener apres souper, pour recreer les esprits. Il n'est pas bon de dormir à midy: & faut fuir toute repletion & satieté combiē que ceste fontaine excite l'appetit à plusieurs, & les incite & irrite souuēt de plus menger, que la force de l'estomach ne le scait cuire.

*¶ Enumeration particuliere des maladies principales, qui se guerissent par la boisson, & vsage legitime de ceste fontaine.*

*Chap. 10*

**A** Pres que nous auons declaré methodiquement, & par raisons naturelles le sain vsage de ces fontaines, il est temps maintenant de declarer en passant de quelles maladies elles guerissent. Et comme plusieurs eaux ferrees chaudes produisent leurs effects manifestes es corps malades: aussi faut il estimer que ces eaux ne sont point inferieures en cest endroit. Car elles estanchent vaillamment la soif, elles r'amaignent à leur temperature le foye & les rongnons par trop chaleus, renforcent l'estomac, & luy dōnent appetit par leur vertu adstrictiue, mais elles nuisent asses à l'estomac debile & extremement froid. Elles proufitēt grādemēt contre obstructions & debilité de la rate, tesmoing Dioscoride & Galen, car elles fondent & guerissent le scirrhe d'icelle. Elles deliurent les rongnōs & vesiē de la grauelle, & aydent à toutes defluxions d'icelles parties, cōme dit Scribonius: Elles corrigent les catarrhes, en quelles parties qu'ilz coulēt, soit en la poitrine, soit en l'estomac, soit aux rōgnōs, ou aux nerfs & muscles: car par l'ayde du soufre & la force du fer q' sont meslez parmy, les matieres se vienēt petit à petit à resoudre, & à secher, cōme nous auons cognu par experience. Par mēsmē methode Mōtagnan vse en quelque conseil, contre rheumes tombans en diuerses parties

ries du corps, de vin fait avec les pepins mesmes pour  
boire en lieu de medecine. Ceste eau guerit les Hydro  
pissies, mais non par toutes: car celles qui sont ia confir  
mées par longuësse de temps, & les forces debilitées,  
il seroit fort difficile de les guerir, pareillement celles  
qui viennent d'un scirrhe de foye, lesquelles Galen dit  
estre incurables: l'experience demonstre aussi que cel  
les qui viennent de secheresse d'estomac, & de longue  
resolution & humidité des intestins, ne se guerissent  
pas facilement. Mais entre ceux, desquelz le commen  
cement de telle maladie prouenoit du vice de la rate,  
le reste des choses non naturelles bien & deuement  
administré: nous en auons veu deux parfaictemēt gue  
ris. Le Seigneur Antoine de Mendoza Espagnol, de  
l'ordre S. Dominique, & le Seigneur Augustin Veni  
tien premier medecin du Roy d'Angleterre Henry  
huitième, lesquels apres vne longue fieure quarte esto  
ient tombez en hydropisie appellé Ascites. Nous auons  
veu aussi celle espeece d'hydropisie, que Aëtius appelle  
Sarcites, estre guerie en vn ieune Gētil-homme Flamēg.  
Mais que tous hydropiques, ou tourmentez d'autres  
maladies grieues, ne se guerissent pas egalemt, la  
cause est, ou qu'ilz n'ont beu en temps & lieu de ceste  
fontaine, ou que la vertu est tant debile, qu'elle  
ne peut pas seulement digerer les viandes conue  
nables, & beaucoup moins toutes sortes de reme  
des. Je parle seulement de ceux que j'ay cognu estre  
gueris par mon conseil & moien, combien que plu

plusieurs autres, prenans trop tard le remede ne soient paruenus à leur entente. Elle ayde grandement les parties amollies & resolues, cōme elle fait toutes autres affectiōs des nerfs & des muscles causees par defluxiō, ce que nous auons veu par experience en magnifique & haute Dame, Dame Marie de Lara Espaignole, laquelle comme desperée de plusieurs medecins, & ne se pouuant nullement soutenir sus ses pieds, apres auoir tenté mille remedes, beut par l'espace de six mois de ceste fontaine, & recouura le mouuement parfaict d'icelles parties. En outre elle renforce l'amarry par trop relachée & humide, & la dispose de telle sorte qu'elle retient le fruit conceu, chassant la sterilité: elle ayde contre strangulations & suffocations de matrice. Vne chose adiousteray- ie seulement, laquelle semblera peut estre à plusieurs incroiable, c'est que tesmoing Paul Aegineta, elle guarit les vrayment lardres, si non du tout, au moins le continuel vsage de ceste eau empeche, que ceste maladie ne s'estend plus auant: & cela me confirme dauantage en mon opiniō, que i'ay entendu des habitans ou ces fontaines acides s'ourdēt, que personne de ceux qui vsent d'icelles pour boisson quotidienne, n'á iamais esté ataint ni entaché de ceste maladie tant mauuaise & contagieuse, attendu mesmement que leur viande soit semblable à celle des Alexandrins, desquelz Galen fait mention expresse, comme de ceux qui pour leur maniere de viure, & l'ær du païs sont fort sujets à telle maladie.



# TABLE DES AVTRES FONTAINES ACIDES PLUS CO-

*gneues fourdans par tout cest endroit de  
la forest d'Ardenne.*

**I**L se trouue aussi par tout en autres endroits tant és villages, qu'au milieu de ceste forest, & és collines, six lieues à la ronde ou dauantage, plusieurs telles fontaines acides, lesquelles differēt seulement selō la plus grāde ou plus petite adstrictiō, lesquelles toutes nous declarerons par ordre, selon que l'auons receu des habitās mesmes de ce païs, & qu'en auōs fait l'experiēce.

La fontaine de Franckorchain, nō guere inferieure en bonté de celle qui se trouue à Spá: car d'icelle en boiuent indifferemment tous les habitās, & s'en trouuent sains & bien disposés.

La fontaine d'aupres de Sart és prez enuirō vne lieue, non inferieure de la precedente. Il y en á vne autre au milieu, delaissée, laquelle on appelle la fontaine S. Iean, plus requise pour baings & lauemens de corps, que pour la boire. Elle guerit de la rongne, & les vlceres pourris.

La fontaine aupres de Malmúdar, là ou y á vn beau monastere de S. Benoit, distāt d'un quart de lieue, au milieu des prez, asses excellent.

Là mesmes aupres de la mōtaine, nō guere loing du monastere, y á vne fontaine de merueilleuse nature, qui se conuertit en pierre, & est toutesfois (comme

on dit) bõne à boire. Mais elle sort seulement le moys  
de May, en forme de ruisseau, de la montaigne, & s'es-  
pand par les prez, & menée par canaus & conduicts se  
conuertit en façon de pierre de tophe ou Tuf, de la-  
quelle on fait fourneaus & cheminées, & d'icelle se  
pourroit à bonne raison dire ce carme d'Ouide.

*Flumen habent Cicones, quod potum, saxea reddit*

*Pectora, & admotis inducit marmora rebus.*

La fontaine en Stabulao, là ou y á vn monastere  
tresancien de ceux de l'ordre S. Benoit, & fort estimé  
à cause de S. Remacle, iadis president d'iceluy. Elle est  
au milieu du pré, y outre le fleuve enuiron vn quart de  
lieue arriere du monastere.

Il y á encore vne autre fontaine de S. Nicolas, appel-  
lé cõmunement Coliẽ, guere loing du monastere des  
moynes Gulielmites de Biẽhapha, en vn village fort  
renommé pour les mines de fer & les forges d'iceluy.

La fontaine de Boffon, distãte du village la mentio-  
né enuiron demie lieue, tant adstringente avec quel-  
que legere acrimonie, qn'on la pourroit à bon droit di-  
re auoir vne mine de Chalcanthum.

La fontaine en la Comté de Durbu, en quelque  
village appellé Isier, non moindre de toutes les autres  
en bõté, & salubrité.

La fontaine de VVerbemon, guere loing du mes-  
me village, boullonnant en la maniere des autres.

La fontaine de Chicurõ, guere loing du village ap-  
pellé Lursi.

La fontaine de Lursi au milieu du bois, non guere differente de celle qui se trouue à Bosson en vehemen-  
ce & adstriction.

La fontaine de Rahier aupres du village, entre le moulin & les forges à fer, atouré par tout de plusieurs fontaines de mesme nature, de sorte qu'on les void miraculeusemēt boullonner par dessus l'eau du petit fleuve qui passe par là.

La fontaine de Ferir asses aussi en estime entre les habitans de ce lieu.

La fontaine de Bodu, distant environ vne lieüe de la deuant dite, bien pres de mesme faculté que l'autre.

La fontaine de Geronster sourdant d'entre les ha-  
liers & lieux inaccessibles, á semblable vertu que les precedentes, mais elle se perd à cause qu'elle n'est pas frequentée.

Nous auõs dit deuant, que nous ferions seulement mention des fontaines Acides, qui se trouuēt par toute ceste contrée de la forest d'Ardenne, lesquelles sont les plus cogneues: cõbien que nous ne soions ignorãs que plusieurs autres se trouuēt tāt en Alemaigne, qu'en Italie, & en Hongrie: toutesfois outre celles que nous auons recité, Mõsieur le Docteur Iean Metel Bourguignon, Iuriscõsulte tresdiligent & tresdocte, nous á communiqué celles icy, lesquelles il se dit avec grande diligence auoir cogneues des paisans dudit lieu.

*Celles qui se trouuent autour de Spá.*

La fontaine de Barisare.

La fontaine des vers.

La Frayneuse.

La fontaine dite VVoitrou.

Iéan Gracieux.

La fontaine del Core.

La fontaine de blanche pierre.

Les males pouhon.

La Duquaige.

Les poulhon Doufflet.

Les poulhon VVinanplange.

*Autour de Malmundar.*

La fontaine Hatze.

La fontaine del Val.

La fontaine des Isles.

Les poulhon de VVeime.

Blanchimont.

*Autour de Stabulao.*

La fontaine de Ruiz.

La fontaine de Ours.

Henry-molin.

Alpreel.

La fontaine appelée Has.

Bremontige.

La fontaine de Hersey.

Il y á encore plusieurs autres fontaines, par tous ces

endroits de la forest d'Ardéne, mais inexplorées à cau

se qu'elles ne sont point hantées & rap

F I N.